


M A R C I A.



MARCIA dicta est, quod in limitibus Scotiae & Angliae prima occurrat ab oriente; March enim limitem significat. & quanquam regionem ipsam vulgus Merciam jam pronuntiat, Marchiae tamen comitatus, qui in hac provincia late patet, Dumborum olim patrimonium, nomen vetustum adhuc retinet.

In media fere regione est Dunsum oppidulum; ubi praefectus annuus (Serifum vocant) Marcianis jus dicit. Fuit hoc antiquum patrimonium Dunforum cognominis oppiduli Dominorum: è qua familia natus est nobilis ille Doctor Subtilis, Ioannes Duns, Scoti agnomen à Patria adeptus: hodie gentiles pauci supersunt, oppiduli ejusdem cives.

Supra Bervicum (vetus Marciae caput) Tweda fluvius Northumbriam Angliae Regionem à Marcia separat, usque ad *Carbomum* castrum: inde torrens Reddenburn dictus, è Zeviotia monte profluens, Northumbriam discescit à Teviotia, sive Tevidale, Scotiae regione. ab occidente brumali Edna fluviolus, (qui prope Spraustonam Twedae admiscetur) Marciam dividit ab eadem Teviotia, usque ad locum Smelum-mill: exinde limes recta fere linea versus occidentem extenditur ad Lauderum sive Lyderum flu. prope castrum Rippeth. ultra Rippethum Lauderus fl. (usque ad rivulum qui Boun dicitur, prope locum Boun-mill) Marciae Lauderiae sive Lauderdeliae limes est. atque ipsa quidem Lauderia, Marciae pars est, patrimonium olim Morvilliorum, (qui exteri & quorum stirps esse desit,) Comitum Stabuli in Scotia. ejus familiae Majestatis damnatae interitu, Lauderia Regis annexa patrimonio, more agrorum regionum, Iudicem sive Balivum habet peculiarem: quo Magistratu fungitur nobilissimus Dominus Ioannes Metellanus Lauderdeliae comes. Ultra fontes Boun rivuli, Marciae limes per obliquam lineam in mappa depictam extenditur per medios montes Lamyrios, qui ipsi partim ad Marciam, partim ad Lauderiam, partim etiam ad Lothianam spectant: à septentrione clauditur fluviolo, Dunglassum Comitum Humii arcem praeterfluente. Reliqua Oceanus Germanicus alluit.

Scotia.

Supra Rippethum in ripa Lauderis fl. est Erildunum villa, Thomae Lermonti patria, qui vixit ad annum à nato Christo c l o c c x c. Is praeter multa alia vaticinia eventu comprobata, praedixit ex Roberti Brusii (qui postea rerum in Scotia potitus est) filia nono gradu oriundum, qui divisa Britanniarum Regna communi imperio gubernaturus esset. quod oraculum diu jactatum, tandem post annos plus trecentos, in Iacobo VI Scotorum Rege ad Anglorum imperium feliciter evecto, fuit expletum.

Tota Marcia, intra Lamyrios montes pascuis admodum felices, arvo fertili numerosos alit incolas, in pace industrios, in bello strenuos: qui adversus Anglos modico fluvio diremptos sua fortissime defendebant. Multas etiam habet arces firmissimas, adversus Anglorum exercitus tuta olim receptacula: quarum praecipuae sunt Humia in colle acclivi sita, quae Humiae Comitibus, totique Humiorum genti in Marcia potentissimae nomen dedit: & Falcasterum in promontorio Maris Germanici, natura loci & hominum industria munitissimum. Dunsum etiam, Langtona & Nisleta sunt arces admodum firmae. uti & Waderborne, & Aytone Humiorum ambo.

Infra Falcasterum arcem in littore maris Germanici est Coldingamia, nobile & opulentum nuper canobium, Edgari Regis Scotorum opus, qui vixit ad annum à nato Christo c l o c. Divae Ebbae virgini dicatum, cuius etiam promontorium propinquum, vulgo Ebbes-head, navigantibus satis celebre est, posterius in D. Cuthberti nomen translatum. habebat & Marcia monachorum canobia Caldstreamum ad Twedam fl. & interius Ecclesiam Strafantanam (sive Trefontanam) & S. Bothani à Marciae Comitibus, aut earum uxoribus fundata.

Sunt in hac provincia Curiae, sive parochiales, ut vocant, Ecclesiae 35. in dioecesi Episcopi Edimburgensis.

Tota Regio abundat omnibus ad usum vitae necessariis: nisi quod Lithathratas, sive carbones lapideos ex vicinis regionibus ad ignis pabulum plerique cogantur invehere, praesertim qui versus Twedam spectant. Tota etiam splendidis nobilium villis egregie decorata est, excepta maris Germanici ora, quae solo asperior est & incultior.

O